

Universitäts- und Landesbibliothek Tirol

Franz Schweyger's Chronik der Stadt Hall

Schweyger, Franz

Innsbruck, 1867

Zweiter durchzug der Wälschn

Durchzüg der Wälschn.

1546 Am 1. August seind zue Hall eingrittn umb die 10 ur vor mittag ungefärlieh pey 2000 graisige pfärdt mit wälschm kriegsvolkh, seind über nacht in der statt pliben. Hat disen tag seer fast gregnet. Am morgen in aller früe um 3 ur der kays. mjt. zue geraist auf Regnspurg, nachmals auff Inglistat.

Zweiter durchzug der Wälschn.

Am 2. August seind zue Hall ankumen wälsch kriegsvolkh pey 78 fannlin ungefarlichen. Seind gschätzt worden auff 25000 man mit sambt dem tross, auch wälschm adl, so auff yr aignen khosten seind zogen, aber der rechtn soldatn seind geschätzt wordn pey 12000, der merer tail haggnschützn. Seind über nacht zue Hall pliben, in der statt, Vassergassn, zu Praitweg, auff der Schrammen, auch in den städln darpey. Ain ersamer rat hat in ain guet gleger und lossement lassn zuerichtn an der undern lendt, haben aber pey dem öbristn und der kgl. regierung nit khunnen erlangen. Es ist auch disen und ander tag schonn wetter gewesen. Ier öbrister ist gewesen ain herzog Octavio von Camarin, ain junger herr, über 24 jar nit alt. Sein leidenant ist gewesen Alexander de Widello. Hat pey 40 teutsch trabanten ghabt, auch 10 edlknamen auf schönen pfärden in seiner farb geklaidt, feyelfarb, mit sambt anderm hofgesindt, auch pey 20 maulöslen mit güettern. Den andern tag all auff dem landt fuer Pamlkirchn und Fump der kays. mjt. auf Ingolstatt zue.

Dritter durchzug, teütschm kriegsvolk.

Am 4. August seind zu Hall ankumen umb 1 ur nach mittag 10 fännl teütsch knecht, 5000 stark. Seind von der kays. und kgl. majestät angnumen worden in Schwarzwald, Preissgau, Heggau, Sungei, Lebertal. Sind über den Arlperg her khumen, haben ihr nachtgleger zue Hall in der statt ghalten, den andern tag durch Schwatz auff Rattberg, nachmal eylents der kays. mjt. zue. Dise 2 tag hat es fast geregnet. Sy haben auch mit ynen prachte pey 100 hauptvrich oder khüe, so sy der statt Linda am Podnsee auff ainer alm haben erpeutt. Ir öbrister ist gewesen herr Bernhardt von Schumberg, seyn leydanant ain junger graff, Jörg von Helffenstein.